



Broj: KSI-09-222/25

Datum: 26.11.2025. godine

Na osnovu člana 25. tačka (g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“ broj: 04/21) i člana 25. stav (2) Poslovnika o radu Komisije za odlučivanje o sukobu interesa, postupajući po anonimnoj prijavi, podnesenoj protiv nosioca javne funkcije R. N., direktora Fonda zdravstvenog osiguranja Brčko distrikta Bosne i Hercegovine, na 137. sjednici održanoj dana 26.11.2025. godine, donosi

ODLUKU

Postupak za odlučivanje o sukobu interesa protiv nosioca javne funkcije, R. N., direktora Fonda zdravstvenog osiguranja Brčko distrikta Bosne i Hercegovine neće se pokrenuti, obzirom da iz dostavljenih podataka i dokumentacije ne proizilazi da je u postupanju nosioca javne funkcije došlo do povrede odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanja sukoba interesa.

Образложење

Dana 13.11.2025. godine, Komisija za odlučivanje o sukobu interesa zaprimila je anonimnu prijavu, broj: KSI-09-222/25, radi sumnje na povredu Zakona, odnosno postojanja sukoba interesa kod nosioca javne funkcije R. N., direktora Fonda zdravstvenog osiguranja Brčko distrikta Bosne i Hercegovine.

U prijavi se navodi da R. N. zloupotrebljava svoj položaj, pogoduje pri zaključenju ugovora privatnim klinikama u zamjenu za finansijsku naknadu, a da je jedan od primjera privatna klinika iz Bijeljine koja je slala više puta upit za ugovor za magnetnu rezonancu. Obzirom da određene klinike nisu dale novac, kako se to navodi u prijavi, predmet je više od godinu dana na čekanju, a isto važi i za klinike iz okruženja. Dalje navodi da je trenutno aktuelno sklapanje ugovora sa kućama za prenatalne testove trudnica.

Članom 2. tačka c) Zakona o sprečavanju sukoba interesa u institucijama Brčko distrikta Bosne i Hercegovine propisano je da je „nosilac javne funkcije“ izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lice koje je imenovano, odnosno na čiji izbor i imenovanje saglasnost daje Skupština, odnosno Vlada, ukoliko drugim zakonom nije drugačije propisano.

Uvidom u Registar javnih funkcija i nosilaca javne funkcije, koje vodi Komisija, utvrđeno je da R. N. obavlja funkciju direktora Fonda zdravstvenog osiguranja Brčko distrikta Bosne i Hercegovine na osnovu Odluke Skupštine Brčko distrikta Bosne i Hercegovine broj:

██████████ od 07.02.2022. godine, te je obavezan postupati u skladu s odredbama Zakona o sprečavanju sukoba interesa u institucijama Brčko distrikta Bosne i Hercegovine.

Komisija je postupajući po navedenoj prijavi, a shodno navedenim činjenicama tražila zahtjevom podatke ili dokumentaciju od strane Fonda zdravstvenog osiguranja Brčko distrikta Bosne i Hercegovine, a koji se odnosi na to da li Fond zdravstvenog osiguranja Brčko distrikta Bosne i Hercegovine u proteklih godinu dana zaprimio pismo namjere od strane zdravstvene ustanove iz Bijeljine koja je bila zainteresovana da sa Fondom zdravstvenog osiguranja zaključi ugovor za pružanje dijagnostičkih usluga magnetne rezonance (magnet) i kompjuterizovane tomografije (CT). Takođe, Komisiji je potrebna informacija šta je ishod pisma namjere, ukoliko je isto zaprimljeno u nekom periodu tokom prethodne godine, da li je zaključen ugovor, da li Fond zdravstvenog osiguranja Brčko distrikta Bosne i Hercegovine namjerava zaključiti ugovor sa navedenom zdravstvenom ustanovom iz Bijeljine ili je zahtjev odbijen i konkretno da li je Fond zdravstvenog osiguranja Brčko distrikta Bosne i Hercegovine zaključio ugovor sa nekim poliklinikama ili drugi akt vezano za prenatalne testove trudnica, te u vezi sa time, kojim pravnim aktom je definisano i uređeno zaključivanje ugovora sa zdravstvenim ustanovama van Brčko distrikta Bosne i Hercegovine i da li su gore navedene vrste usluga van Brčko distrikta Bosne Hercegovine predmet javnog poziva od strane Fonda zdravstvenog osiguranja.

Fond zdravstvenog osiguranja Brčko distrikta Bosne i Hercegovine aktom broj: ██████████ od 20.11.2025. godine, zaprimljen dana 25.11.2025. godine, obavijestio je Komisiju da je Fond zdravstvenog osiguranja Brčko distrikta Bosne i Hercegovine u posljednjih godinu dana zaprimio pismo namjere od strane zdravstvene ustanove iz Bijeljine, koja je bila zainteresovana da sa Fondom zaključi ugovor za pružanje dijagnostičkih usluga magnetne rezonance (MR) i kompjuterizovane tomografije (CT). Dalje, ugovor sa zdravstvenom ustanovom koja je dostavila navedeno pismo namjere nije zaključen, ali prijedlog za saradnju još nije ni odbijen, ali da se trenutno vrši analiza dostavljenog prijedloga za zaključivanje ugovora unutar službi u Fondu, te će se o prihvatanju prijedloga za saradnju naknadno odlučiti na nivou organa upravljanja. Imajući u vidu navedenu situaciju, Fond navodi da ne postoje elementi hitnosti, niti utvrđeni rokovi za postupanje, a posebno jer navedene dijagnostičke pretrage Fond već ima ugovorene za nekoliko zdravstvenih ustanova. Navode, da Fond nije obavezan po automatizmu stupiti u ugovorni odnos sa svakom zdravstvenom ustanovom koja dostavi pismo namjere i ponudi pružanje određenih zdravstvenih usluga i da se ugovaranje obavljanja zdravstvenih usluga za potrebe osiguranih lica Fonda vrši se u skladu sa odredbama Zakona o zdravstvenom osiguranju Brčko distrikta Bosne i Hercegovine i na osnovu tih odredaba donesenom Odlukom o utvrđivanju osnova, kriterijuma i standarda za ugovaranje zdravstvene zaštite za potrebe osiguranih lica Fonda zdravstvenog osiguranja Brčko distrikta Bosne i Hercegovine, broj: ██████████ od 27.05.2014. godine. U konačnom, Fond ističe da navedene zdravstvene usluge (MR i CT) nisu bile predmet javnih poziva za zaključivanje ugovora i da Fond nije zaključio ugovore niti je donio bilo kakve akte koji se odnose na obavljanje prenatalnih testiranja za trudnice.

Članom 27. Zakona o zdravstvenom osiguranju Brčko distrikta Bosne i Hercegovine propisano je da se zdravstvena zaštita pruža osiguranicima u javnim i zdravstvenim ustanovama i privatnim praksama sa kojima Fond zdravstvenog osiguranja Brčko distrikta Bosne i Hercegovine ima zaključen ugovor o pružanju zdravstvene zaštite.

Član 28. stav 1) i 2) Zakona propisuje da ugovor određuje vrstu, obim i kvalitet usluga koje zdravstvena ustanova treba da pruži osiguranicima, naknade koje Fond zdravstvenog osiguranja plaća za pružanje ugovorenih usluga, metode obračunavanja i plaćanja usluga i druga uzajamna prava i dužnosti ugovorenih strana, dok osnove, kriterijume i standarde za uređenje navedenih pitanja određuje Fond zdravstvenog osiguranja, uz prethodno pribavljeno

mišljenje Odjeljenja za zdravstvo, dok istim članom stav (3) Zakona propisano je da osnovama, kriterijima i standardima za zaključenje ugovora predviđenim u navedenom članu, osigurava se zakonito i pravilno uspostavljanje ugovornih odnosa između Fonda zdravstvenog osiguranja i davaoca usluga – zdravstvene ustanove, utvrđuju elementi koji moraju biti uključeni u ove ugovore, metode određivanja vrste, obima i kvaliteta usluga, metode naknada, metode kontrole pruženih usluga, vrste i kvalitet pruženih usluga i regulišu druga pitanja u vezi s tim.

Nadalje, članom 83. Zakona o zdravstvenom osiguranju Brčko distrikta Bosne i Hercegovine propisano je da Fond zdravstvenog osiguranja obavezan da poslujući efikasno obezbijedi racionalno trošenje sredstava, da svima osigura jednak pristup zdravstvenoj zaštiti, kao i tretman u skladu sa dostignutim stepenom naučnih saznanja i kvaliteta osiguranja.

Shodno navedenim odredbama Zakona o zdravstvenom osiguranju Brčko distrikta Bosne i Hercegovine, vidljivo je da Fond zdravstvenog osiguranja Brčko distrikta Bosne i Hercegovine zaključuje ugovore vodeći računa o racionalnom trošenju sredstava, te imajući u vidu da Brčko distrikt već ima zaključene ugovore o pružanju usluga MC i CT nije bilo potrebe za hitnim ugovoranjem usluga sa još većim brojem dobavljača za istu vrste usluge.

Uvidom u dostavljene podatke i zakonske odredbe, po automatizmu Fond zdravstvenog osiguranja Brčko distrikta Bosne i Hercegovine ne mora, niti ima obavezu stupiti u ugovorne odnose sa svakom zdravstvenom ustanovom koja dostavi pismo namjere i ponudu. Obaveza koja postoji na strani Fonda zdravstvenog osiguranja Brčko distrikta Bosne i Hercegovine je da shodno svojim nadležnostima u narednom u periodu razmotri svako pristiglo pismo namjere.

Iz svega navedenog i prikupljene dokumentacije Komisija za odlučivanje o sukobu interesa, je stava da R. N., kao nosilac javne funkcije, nije povrijedio odredbe Zakona o sprečavanju sukoba interesa u institucijama Brčko distrikta Bosne i Hercegovine, odnosno da ne postoji sukob interesa, jer nisu utvrđene okolnosti koje bi ukazivale na moguću povredu odredaba Zakona od strane nosioca javne funkcije, obzirom da se u ovom slučaju sve aktivnosti nosioca javne funkcije obavljane u skladu s nadležnostima Fonda zdravstvenog osiguranja Brčko distrikta Bosne i Hercegovine odnosno ovlaštenjima direktora.

Slijedom navedenog, Komisija je donijela odluku kao u dispozitivu.

Pouka o pravnom lijeku:

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta Bosne i Hercegovine u roku od 30 od strane nosioca javne funkcije.

Predsjednik
Komisije za odlučivanje o sukobu interesa

Admira Mujić, dipl.pravnik

Dostaviti:

- Anonimnom podnosiocu putem oglasne ploče,
- Internet stranici,
- Evidenciji,
- Arhivi.